

Na scola semper più leèda al teritorie

Na scontrèda endrezèda enstadi te la Sorastanza à domanà e metù dant proponetes de colaborazion con i raprezentanc di desvalives setores de la comunanza

Poza - Ence se ben l'envit a duc i raprezentanc de teritorie l'é ruà fosc massa tèrt, enstadi aló da la senta de la sorastanza de Poza se à tegnù na scontrèda per endrez de la responsabola de la scola populèra de Fascia, Daniela Chiocchetti.

La lege de reforma de la scola del 2006 (nr. 5/06) à segnà n moment de renovament e de reforma del sistem de istruzion e formazion del Trentin. Un di elemenc de emportanza de la lege medema l'é chel de tegnir en gran cont e vardèr de tor ite i raprezentanc del teritorie, chierian la colaborazion di medemi per portèr inant te la scola programes, projec e scomenzadives che posse responder ai besognes de la comunanza slarian l'azion educativa de la scola ence

fora da si parees.

La sorastanta Mirella Florian donca l'à envià a chesta scontrèda duc i raprezentanc de teritorie per averjer n descors de chest vers e proèr a tor sù vèlch opinion o proponeta ence da chisc sogec che podessa didèr a smaorèr i raporc co la scola.

Apede ai raprezentanc de Fascia à tout pèrt a la scontrèda l dr Francesco Bailo, referent per i projec de la neva tecnologies didatiches de l'Iprase de Trent e l dr Alessio Surian de l'Università de Pèdua, che ge stèsc dò al projet "Didaduezero" che à l'obietif de verificchèr se, tras la doura del Social Software, l'é meso de miorèr l raport anter scola e teritorie.

Da chesta scontrèda l'é vegnù

fora n confront de opinions enteressant: dai raprezentanc di Comuns, de l'Istitut Cultural Ladin e de l'Union di Ladins vegn segur de bona imprescions de colaborazion e i joegn i vegn conscidré dalbon la centa de trasmiscion de na cultura passan da la scola a la comunità.

Chisc sogec se à dit dalbon contenc de poder se meter a la leta de la scola, che – à dit l diretor de l'Istitut Cultural Ladin Fabio Chiocchetti - "l'é noscia referenta prinzipala".

A la fin de la scontrèda la sorastanta à palesà gran sodesfazion per l'ejit de la scontrèda e ence per l raport anter scola e teritorie. Chel che vegn domanà da pèrt de duc l'é apontin maora colaborazion anter i sogec de val, tras la costruzioni de rei che podessa portèr a de neva idees per l davegnir de nesc bec.

Da pèrt di esperc da Trent e da Pèdua, che che vegn fora l'é che i problemes che vegn osservà chiò te val l'é i medemi che se troa te zità e chel che de ùtol se podessa fèr l'é zenz'auter proèr a trèr ite chi sogec del teritorie più leé al turism, aboncont perché te Fascia chest setor l'é na ressorsa zis emportanta. (vr)



N moment de la scontrèda anter i raprezentanc de la scola e del teritorie de Fascia.